

**Naalakkersuisunut apeqqu: Qaqortumi 1199 meterisut takitigisumik mittarfiliornissamik Naalakkersuisut pilersaaruteqarpat?**  
(Inatsisartunut Siumup ilaasortai)

**Akissuteqaat**

(Ineqarnermut, Attaveqarnermut Angallanermullu Naalakkersuisoq)

Qaqortumi 1199 meterimik mittarfiliornissamik Naalakkersuisut pilersaaruteqarnermut, Inatsisartuni Siumup ilaasortai apeqquaqarput, tassanilu inuussutissarsiornikkut angallanermilu aningaasaqarnikkut tunngavissalimmik, nunap immikkoortuanut tamarmiusumut iluaqutaasinnaasumik aqqiinissaq immikkut innersuussutigineqarpoq.

Siunissami assartuussinerup ilusissaa, nunat immikkoortuini, inuussutissarsiornermi pingaartumillu nunap aningaasaqarnikkut piginnaasai eqqarsaatigalugit ataqatigiissussaq Naalakkersuisunit sammineqartorujussuuvoq. Taamaattumik naluneqanngitsutut Naalakkersuisut Assartuussineq pillugu Isumalioqatigiissitamik pilersitsipput, taassumalu Kalaallit Nunaanni attaveqaatinik tamanik misissueqqissaarnerminit nalunaarusiamik saqqummiinissani siunertaraa. Misissueqqissaarnermut soorunami Kalaallit Nunaata kujataanut – taamatullu aamma Qaqortumut – aqqiissutaasinnaasut ilaatinneqarput.

Misissueqqissaarnermut assigiinngitsorpassuit ilaatinneqarput. Taakku ilaattut angallannikkut ajornartorsiuterpiaannanut tunngasut taaneqarsinnaapput, taakkununga ilaallutik ilaatigut ilaasorpassuit ullumikkut qulimiguulimmik Qaqortup Narsarsuullu akornanni angallanneqartartut. Kiisalu attaveqaatit nunap immikkoortuani takornariaqarnerup ineriartorneranut pingaaruteqarnerat nalilersuinernut ilaatinneqarpoq, taamatullu aatsitassarsiornermi periarfissat eqqarsaatigineqarlutik.

Pilersaarutit malillugit Assartuussineq pillugu Isumalioqatigiissitap isumaliutissiissutissani ukioq manna aasap ingerlanerani tunniuttussaavaa, taamaattumillu nunap immikkoortuani ineriartortitsinissamut pilersaarutit isummerfigineqarsinnaaneranut tassani inassuteqaatigineqartussat Naalakkersuisunit utaqqineqarput.